

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xikihi mé xrankíxixín tí tan jína kuènte Jesu-
cristo mé tí Xjeen Dios.

² Ósé mé kjuák'e ch'ín Isaías mé ijnko nkexro
tsíchr'án Dios chrónka itén ch'án k'uékjin ch'án
nkexrí nixjehē Dios tí Xjeen ch'án ntáchro kixin:
Janhan tsochr'an ijnko nkexro tsochrónka tan
kuèntana tsitónxin ntja,
kixin tsjasiyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje
ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni, tak-
itjehérá ijnko ntja ntoí.”†

⁴ Tíha mé xíteyá ikui ch'ín Juan Bautista, mé
xikaha kjuák'e ch'án nteje kuikite ch'án chojni.
Kjuakohe ch'án chojni ntíha kixin chrókjuinkí sín tí
nkehe tjenkayáxin sín chrókuítóhe sín tí ijje sín ntá
chrókuikite sín kixin xikaha mé chrókjuin ijje sín.

⁵ Itsjé chojni kuixin estado Judea la ko tí chjasin
Jerusalén ikui sín tí kjuák'e ch'ín Juan kuínhin sín
tí nkehe kjuako ch'án ntá chrónka sín tí jje yámá
sín ntá ch'ín Juan mé kuikitexin sín ch'án ntario
Jordán.

* 1:2 Malaquías 3.1 † 1:3 Isaías 40.3

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje.

⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuana chrókjuasintanka tí correa tí tokaté ch'án.

⁸ Janhan mé ìnta ó kuíkítexínrá. Ntá jehe ch'án mé tsikítexínrá ch'án tí Nchakuen Dios —ichro ch'ín Juan.

Ch'ín Juan kuíkíte ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuíkítexín ch'án tí ntario Jordán.

¹⁰ Tió k'uaxrjenkixin ch'ín Jesús tí ìnta, ntá xrínahya titàya k'uíkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án.

¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'án jie

(Mt. 4.1-11; Lc. 4.1-13)

¹² Ntá tí Nchakuen Dios mé sákjuíko tí ch'ín Jesús nteje.

13 Kjuák'e ch'án cuarenta yaon tí nteje la ko ntiha mé k'uíxin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankíxixín kjuako ch'án estado Galilea

(Mt. 4.12-17; Lc. 4.14-15)

14 Kjuixin kjuák'echjina ch'ín Juan ntøechiso ntá ch'ín Jesús na mé sákjuí ch'án nó estado Galilea sákjuíkjakøhe ch'án tí sín ntiha tí tan jína kuènte Dios.

15 Ntá ntáchro ch'án kíxin:

—Ó kjuixraká tí yaon, la ó tsi tí kjuachaxin kuènte Dios ts'etøan ch'án. Chrókuítøherá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uíyehé noó tí sín itsé koche

(Mt. 4.18-22; Lc. 5.1-11)

16 Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sín tí nchísén chrínkí ntá.

17 Ntá ntáchro tí ch'ín Jesús kíxin:

—Chrèherá tí janhan, ntá tsotjahará xra tsjéyará chojni —ichro ch'án.

18 Ntá tuénxín kuítøhe sín tí nchísén k'uétséya sín koche ntá sákjuíko sín ch'án.

19 Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí íjnko la mé it'in Juan. Jehe sín la ko tí it'é sín tjejóxenhén sín tí ntabárcø tjejójtjonité sín tí nchísén tséya sín tí koche.

20 Na ntá ch'ín Jesús mé k'uíyehē tí jehe sín kíxin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárcō la ko tí sín tjinkítsa ch'án ch'e xra. A ntá jehe sín sákjuiko sín ch'ín Jesús.

*Ijnko chojni chóna ijnko nchakuen tí jínahya
(Lc. 4.31-37)*

21 Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'in Jesús tí nínko Israel. Na ntá ntaha mé kjuankíxin ch'án kjuako ch'án.

22 A ntá tí chojni síin ntiha mé chrakon sín kuínhin sín tí nkehe kjuako ch'án kíxin kjuakoxin ch'án kíxin chóna ch'án kjuachaxin, la jehya éxí tí sín maestro tjako tí ley, ichro sín.

23 Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kíxin:

24 —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kíxin sínchek'itjáyani? Janhan mé ó kjuátsōan tí jaha, la ko nōna kíxin jaha tí nkexro tjóá kuènte Dios —mé xíkaha ichro tí nchakuen tí jínahya.

25 Ntá ch'ín Jesús mé k'uētuenhén tí nchakuen tí jínahya ntáchro ch'án kíxin:

—Tániá, t'axrjéxian tí jehe ch'án —mé xíkaha ichro ch'ín Jesús.

26 A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjexín tí ch'ín a.

27 A ntá kaín sín chrakon sín ntá kjuanchankíhi sín kíchó sín, ntáchro sín kíxin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuñhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uixikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro

(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjexín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sin ntøe ch'ín Simón la ko ch'ín Andrés.

³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús.

³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

Ch'ín Jesús kjuínchekitohe jína nchónhya chojni níhi

(Mt. 8.16-17; Lc. 4.40-41)

³² A ntá tió kjuiátaón yaon tió k'uixin tie kjuikohe sín tí ch'in Jesús kaín tí sín níhi la ko tí sín chóna nchakuen jínahya;

³³ na ntá kuenté chjasin kójnkotsé sín k'uixintankí sin ntója tí nchia a.

³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsøan tíha nkexro tí jehe ch'án.

Ch'ín Jesús mé kjuako ch'án estado Galilea

(Lc. 4.42-44)

³⁵ Ntá naxa sítíé k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní.

³⁶ Ntá ch'ín Simón la ko tí sín xriko ch'án mé sákjuíkjoyá sín ch'án.

³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xíkaha mé tí k'uaxrjexian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chónṭa sín.

Ch'ín Jesús kjuínchekitoḥe jína ijnko ch'ín chónṭa chinlepra

(Mt. 8.1-4; Lc. 5.12-16)

⁴⁰ Ntá kui ijnko ch'ín chónṭa chinlepra kjuák'exín toch'in ch'án nkayakon ch'ín Jesús ntá chrónóeḥe ch'án ntáchro ch'án kixin:

—Tí tjínkávan jaha la jína chrókjuínchekitoḥéni jína —ichro ch'án.

⁴¹ Ntá ch'ín Jesús na imá kuíkonóeḥe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xíkaha tjínkávan. Ntá jie sintakitoha jína —ichro ch'án.

⁴² A ntá xíkaha ntáchro ch'án ntá tuénxín kjuìn tí chinlepra ntá kuítóḥe ch'án jína.

⁴³ Ntá k'uetuēnhen ch'ín Jesús tí ch'ín a kixin tjoka sátsji ch'án, ntáchro ch'án kixin:

44 —Ninkexró chenkahya ntihi; jehó sátjia tjákehé tí ch'ín nchaṭ'á kixin ó kjuìlnhan tí chinlepra la ko tjánjuan tí nkehe tsík'etōan ch'ín Moisés‡ kixin tsonoexín kaín xín chojni kixin ó kuítóha jína —ichro ch'án.

⁴⁵ A ntá tí ch'ín tsíkitohe jína, a ntá sákjuí ch'án kjuankixin ch'án chénka ch'án kaín xín chojni kixin nkexrí kuítóhe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

Ch'ín Jesús mé kjuínchekitohe jína ijnko chojni tsík'en toté

(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uíxikónohe chojni kixin ijnko nchia ntiha kjuák'e ch'án.

² Ntá tuénxín nchónhya chojni kóchjina ntá kjuachahya tí nchia k'uíxixenhen sín la ko kjaxin kjuachahya tí ntója nchia chrók'uíxintankí sín. A ntá ch'ín Jesús kjuako tí tan jína kuènte Dios.

³ Ntá kui noó sín tinkátsénkí sín ijnko ch'ín tsík'en toté ch'án.

⁴ Kjánchó xitjahya kóchjina sín tí tjen ch'ín Jesús kixin nchónhya chojni siín. La ntá k'uit'ótjen sín tí chrítaón nchia a ntá k'óxrat'o sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a.

⁵ Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí

‡ 1:44 Levítico 14.1-32

jehē ch'án. Ntá nixjehē ch'án tí s̄inníhi ntáche ch'án ḱixin:

—Xjēenni, ó kjuixin kjuìnhan tí jie chonta —mé x̄ikaha ichro ch'án.

⁶ Na ntá iso tí s̄ín maestro tjako tí ley tjejótj̄ax̄in s̄ín ntiha na ntá jehó s̄ín mé kjo s̄ín as̄én s̄ín ḱixin:

⁷ “¿Nkekuènté x̄ikaha nixja tí ch'ín i ncheyóhe ch'án as̄én ch'án Dios? Ḱixin ninkexró xitjahya tsjats̄in ijie ḱixin jehó Dios mé chóna kjuachaxin tsjatsen ijie chojni”, mé x̄ikaha ikjo s̄ín as̄én s̄ín.

⁸ Ntá ch'ín Jesús la ó nohe ch'án nkehe tjenkayáxin s̄ín. Ntá ntáchro ch'án ḱixin:

—¿Nkekuènté ḱixin x̄ikaha tjenkayáxinrá?

⁹ ¿Nkehe ants̄í má x̄ahya chróntátjan ch'án? ¿Á ants̄í x̄ahya chróntátjan ch'án ḱixin ó kjuixin kjuìnhin ch'án tí jie yámá ch'án, o á ants̄í x̄ahya chróntátjan ch'án ḱixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án?

¹⁰ Méxra jie tsjákoxiān ḱixin tí Xjēen Dios K'óna Chojni mé ntihi chjasintajni chóna kjuachaxin tsjakjìnhin ijie chojni —ichro ch'án.

Ntá ntáche ch'án tí ch'ín xitjahya tji ḱixin:

¹¹ —Jaha tétuānhan t'inkatjen, tjenájían kaniaa na sātjia ntōa —ichro ch'án.

¹² A ntá tí s̄inníhi na tuénxín k'uínkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí s̄ín siín a tsjehe s̄ín nkexrí kónhen na chrakon s̄ín la ko kjuanchehe s̄ín Dios kjuasáyé. Ntá ntáchro s̄ín ḱixin:

—K'uíkonhyéni tí nkehe i —ichro s̄ín.

*Ch'ín Jesús k'uíyehẹ ch'ín Leví
(Mt. 9.9-13; Lc. 5.27-32)*

¹³ A ntá chr'éxìn ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án.

¹⁴ Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxìn ch'án tjenchekjènkì ch'án. Ntá ch'ín Jesús mé k'uíyehẹ ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhe ch'án tí ch'ín Jesús.

¹⁵ A ntá ch'ín Jesús kjuák'e ch'án ntøe tí ch'ín Leví, la ntá kjuanjon sín nkehe sine ch'án la ko kjaxin k'uéjò nchónhya tí sín nchekjènkì la ko kjaxin í so chojni chóna jje. Mé kaín tí sín a mé tjejótxaxìn sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhe sín tí jehe ch'án.

¹⁶ Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín ti sín nchekjènkì la ko tí í so sín chóna jje, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikao ch'án tí sín nchekjènkì la ko tí í so sín chóna jje? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhi. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi kixin chrók'uíyahẹ chojni jína tjejó sín. Náhi.

K'uinka ḱixin ts'íyaha chojni chón̄ta jie —ichro ch'án.

Tjanchankíhi sín tí ch'ín Jesús ḱixin á chrókjón̄ehya sín tió tsonixjehe sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjón̄ehya sín kuenté yaon ḱixin mé xikaha ts'áyéhe sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín ḱixin:

—¿Nkekuèté ḱixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án ḱixin:

—¿Xá chrókjón̄ehya tí chojni tsík'íyeh̄e sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya ḱixin chrókjón̄ehya sín.

²⁰ A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

²¹ Ninkexró chrókjuak'eniēhe ijnko ka ó ntaxin it'ò ka nixin ḱixin ntá chrókjuixéhe tí ka nixin ntá antsí má chrók'uichje tí ka ntaxin a.

²² La ko kjaxin ninkexró chrókuiqia xran vino nixin ijnko tjuaxran ó ntaxin; ḱixin tí xran vino nixin la chrókótséchje tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín

(Mt. 12.1-8; Lc. 6.1-5)

23 Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte síin noatrigo. Na ntá tí sín k'uájiko ch'án kjuankíxin sín ik'uín sín iso noatrigo.

24 Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuèté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

25 Ntá kjuátèhe ch'án ntáchro ch'án kixin:

—¿Á kjuínchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta?

26 A ntá jehe ch'án k'uíxenhén ch'án ntøe Dios tío kjuák'e nchat'á Abiatar k'uetoan, a ntá kjóne ch'án tí niotja tsíkóyaon kjónté jehó tí sín nchat'á mé k'uéchóna kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

27 Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a.

28 A ntá tí Xjeen Dios K'óna Chojni mé chóna kjuachaxin ts'etoan nkehe tsonhen tí yaon t'ok'éheni —ichro ch'án.

3

Ijnko chojni tsíxámá tja

(Mt. 12.9-14; Lc. 6.6-11)

1 Ntá ch'ín Jesús k'uíxenhén ch'án ijnko nínko Israel ínaá. Na mé ntiha tjen ijnko ch'ín tsíxámá ijnko tja ch'án.

* 2:26 1 Samuel 21.1-6; Levítico 24.5-9

² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsíxámá tja tí yaon t'ok'éhe sín kixin mé jína tsjanchia sín jie, ichro sín.

³ Ntá ch'ín Jesús mé ntáche ch'án tí ch'ín tsíxámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

A ntá jehe sín la táníkoá sín.

⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóehé sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína.

⁶ Na ntá tí sín fariseo a k'uaxrjexín sín nínko sákjuí sín k'uíto sín tí sín kuēnte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea

⁸ la ko chjasin Jerusalén la ko estado Idumea la ko ikjé sín kuixín sín nó tóhe ntario Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin.

⁹ Ntá k'uetuēnhen ch'án tí sín k'uájiko ch'án a kixin ntahó chrókjuak'eçonhen sín ijnko ntabarco. A ntá tí imá chrók'uixitja sín ch'án ntá chrók'uixenhen ch'án tí ntabarco, a ntá ntiha chrókjuak'e ch'án tsochrónka ch'án.

¹⁰ Kixin itsjé chojni tsíkjinchekitóhe ch'án jína, na ntá kaín xín tí sín níhi k'uixitja sín ch'án kixin tjinkaon sín chrókuákóxin sín ch'án.

¹¹ Kjaxin tí sín chóna nchakuen tí jínahya na mé tió k'uikon sín tí ch'ín Jesús ntá k'uéjóxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

*Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)*

¹³ A ntá chr'éxin chriin ch'ín Jesús ijnko jna, a ntá ntiha k'uíyehē ch'án tí sín tjinkaon ch'án chrók'uajiko ch'án ntá kóchjinehe sín ch'án.

¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína.

¹⁵ Kjuanjon ch'án kjuachaxin sinchekitóhe sín chojni níhi jína la ko tsakitsje sín nchakuen tí jínahya chóna chojni.

16 A ntá tí sín i mé tí teyó sín tsíkjejá ch'án mé it'in sín xíkíhi: Simón na mé kjuínchek'in ch'án Pedro;

17 la ko Jacobo la ko tí kícho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta.

18 La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko íjnko Simón tíhi mé kuènte tí sín cananista,

19 la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuènte tí Jínahya

(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia.

20 A ntá inaá kójnkotsé nchónhya chojni, a ntá xitjahya sine sín.

21 Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

22 Kjaxin tí sín tjako ti ley kuixín sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuénhen kaín tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

23 Ntá ch'ín Jesús k'uíyehé ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén?

24 **A** ntá tí sín t'et_oan ijnko nación tjanj_onko kichó la tsjachahya ts'et_oan.

25 La ko kjaxin tí sín jnkokoá nt_oe jnkokoáhya tjenkayáxin sín ntá xitjahya ts'ejóko kichó sín.

26 **A** ntá tí chaxín ch'ín Tsochren jnkokónhya tjenkayáxin tjanj_onko kichó la ntá ts'itjáyan kjuachaxin kuènte.

27 Ninkexró tsjacha ts'ixenhen nt_oe ijnko chojni jiehe kixin ts'axrjehe tí nkehe chón_ta ch'án. Náhí. T'ichjánx_in saxín sinchenteto ch'án tí ch'ín jiehe kixin jína tseéhe ch'án nkehe chón_ta tí ch'ín a.

28 'Ijnko nkehe chaxín tsotj_onkará kixin tió tsoxraxinkaon ijnko chojni tí jie chón_ta la ko tsochronóeh_e Dios la ntá tsjakj_iinhin ch'án kaín tí jie la ko kaín tí nkehe jínahya tsíntáchro sín.

29 **A** ntá tí nkexro ts'ántaxín_hin tí Nchakuen Dios na mé xitjahya tsjin tí jie na mé jnkochr_ixín tsochón_ta sín tí jie a —ichro ch'án.

30 Mé xikaha ichro ch'án kixin tí sín a tsíntáchro sín kixin ijnko nchakuen tí jínahya mé chón_ta tí jehe ch'án.

Tí ìné la ko kichó ch'ín Jesús

(Mt. 12.46-50; Lc. 8.19-21)

31 **A** ntá kui ìné ch'ín Jesús la ko kichó ch'án tjejó sín ntója ó na ntá k'uetu_enhen sín ijnko chojni tsjik'íyeh_e ch'án.

32 **A** ntá tí sín tjejó_tjax_in tí tjen ch'ín Jesús ntiha chénka sín ch'án kixin:

—Íná la ko kichuá tjejó sín ntója xritjeyá sín ti jaha. —ichro sín.

33 Ntá ntáchro ch'án kixin:

—¿Xá nkexro tí nana la ko nkexro tí kichiná?
—ichro ch'án.

³⁴ Ntá komá ch'án tí chojni tjejótxaxin tí tjen ch'án ntá ntáchro ch'án kixin:

—Jahará mé nana la ko kichiná.

³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxí ijnko chojni t'enka nonte (Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabarco tjenkátaón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsikójnkotsé mé kuítóhe sín chrínta ntayaon k'uejókínhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee.

⁴ Mé xikaha sákjuík'enka ch'án iso tí noatrigo a. Ntá iso noa la tsík'ánótjen ntja ntá kui koxroxé k'uínka va tí noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóntha nche.

⁶ A ntá tió kjuiton yaon la ntá tí ka la chján; la ko chóntahya nuée a ntá xamá.

⁷ A ntá í so noa kjuítsínkak'á tí siín kach'i la ntá tí kach'i k'uánkí la ntá tí noa í k'ónahya kixin sítja tí kach'i.

⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la

mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóxin ch'án.

¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuíntayóaxuán kaín nkehe kuínhin sín.

¹² Kixin kjónté ts'ikon sín la éxí k'uíkonyha sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjulínhya tí ijíé sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinyará jahará nkexrí t'axrjexín tí nkehe kjuíntayóaxian ní? ¿A ntá nkexrí chrókiénxinrá tí í so nkehe naxa sintayóaxian?

¹⁴ A ntá tí nkexro sákjuík'enka tí tje a mé yóhe ijnko nkexro sákjuík'jako itén Dios.

* 4:12 Isaías 6.9-10

15 **A** ntá iso chojni la éxí tí tje kjuítsínka ntia; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín.

16 **A** ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín.

17 Kjánchó nínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios.

18 **A** ntá í so chojni la éxí yóhe tí tje k'uínka chrík'á kach'í na mé kuínhin sín itén Dios

19 kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios.

20 **A** ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuíncheyóexin éxí ijnko xrohi tjeche

(Lc. 8.16-18)

21 Kjaxin ntáchro ch'ín Jesús kixin:

—¿Á chrókujkaonni xrohi tjeche chrókjuak'emá chrínkí ntacajón o chrínkí cama? Kjá náhí. Tí xrohi la noi chrókjuak'e ts'inkaséyanxín.

22 Mé xikaha kaín tí nkehe tjejó má jie tsonoxín chr'éxín la ko kaín tí nkehe ninkexró noehya jie la tsonoxín chr'éxín.

23 A ntá tí nkexro tjinkaon chrókuinhin la chrókuinhin tíhi —ichro ch'án.

24 Kjaxin ntáchro ch'án kixin:

—Chrókjuenkayáxinrá jína tí nkehe tjejó tinhinrá. Tí nkehe tjáchoayára jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá.

25 A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijnko tje ts'ayan ts'ánkí

26 Kjaxin ntáchro ch'ín Jesús kixin:

—Tí kjuachaxin t'etōan Dios tóyóhe ijnko chojni sátsjik'enka nonte.

27 Ntá sákjuík'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uenkā la noehya ch'án nkexrí kónhen tíha.

28 A ntá tí nche mé kjuích'e xra jehó. Senó k'uayan tí chaon tí ka, a ntá kjuintaā, a ntá chr'éxín icha tí noa tsjinjin;

29 a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

Ch'ín Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

30 Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'et̄oan Dios, nkehe chrókóyóexin tíha?

³¹ Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó.

³² A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxe xritjaka la jína ts'ok'éhe va chrínkí tí ts'van chaon tí nta.

Nkehe tí xra kjuích'e tí nkehe kjuíncheyóexin ch'ín Jesús

(Mt. 13.34-35)

³³ Mé xikaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha.

³⁴ Kaínxín nkehe kjuakohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

Ch'ín Jesús k'uetuēhen ch'án tí xr̄into la ko tí nt̄a síchrica kixin ts'ixita

(Mt. 8.23-27; Lc. 8.22-25)

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús nax̄a tjenkáya ch'án tí ntabárc̄o la ko kjaxin í so ntabárc̄o sákjuí koí.

³⁷ Ntá xr̄inahya tjian chjéhe xr̄into la ntá síchrica nt̄a t'ixenhen tí ntabárc̄o, ó mero tsokaón nt̄a tí ntabárc̄o.

38 A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárc̣o a tjejkjón ch'án ijnko ka. Na ntá kjuínchekjàya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

39 A ntá ch'ín Jesús k'uàya ch'án, k'uetuēnhen ch'án tí xr̄nt̄o la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xr̄nt̄o la ko tí ntá k'uíxratá.

40 Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuèté kixin imá chrakonrá? ¿Á nax̄a tin-kachónkihyará Dios? —ichro ch'án.

41 Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xr̄nt̄o la ko ntayaon la mé kjuínchexiteyéhe ch'án —ichro sín.

5

Ijnko chojni chón̄ta nchón̄hya nch̄akuen tí jín̄ahya nonte Gadara

(Mt. 8.28-34; Lc. 8.26-39)

1 Ntá tió k'uátòye sín tí ntayaon, a ntá kjuíji sín tí nonte Gadara.

2 Ntá k'uínkaj̄inx̄in ch'ín Jesús tí ntabárc̣o a. Ntá xr̄ináhya xeta ch'án ijnko ch'ín kuix̄in nó tsík̄jixravá chojni mé chón̄ta ch'án ijnko nch̄akuen tí jín̄ahya.

3 Tí ch'ín a mé kjuák'e ch'án tí tsík̄jixravá chojni. Ninkexró tjachahya sinchenteto ch'án kjónté cadena tjachahya.

4 Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchrítõn ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án.

5 K'uék'aji ch'án nchakotjin la ko tie t'íyato ch'án nó jna la ko tí tsíkji_xravá chojni la ko chjéhe asén ch'án xro.

6 Na ntá k'uikon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a

7 k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchekjasótehyani —ichro ch'án.

8 Mé xikaha ichro ch'án kixin tsíntáchro ch'ín Jesús kixin:

—Jaha nchakuen tí jínahya, títõhé tí ch'ín i —ichro ch'án.

9 Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

10 Ntá imá chrónóehe ch'án tí ch'ín Jesús kixin tsochr'ánhya ch'án ókjé tí nchakuen tí jínahya.

11 Na ntá síin nchónhya cochíno xrine va chjinaxón tí jna ntiha.

12 A ntá chrónõa tí nchakuen tí jínahya ntáchro kixin:

—Tétuenhénni sátsjini tí síin tí cochíno, títõhé ts'ixenhenni tí jehe va —ichro tí nchakuen tí jínahya a.

13 Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuik'ixenhen tí cochíno a. Na ntá kaín xín tí ko a mé chjina iyó mil va síin va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntá.

14 Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha.

15 Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchónta tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án iké ch'án, na ntá chrakon sín.

16 A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a.

17 Ntá kjuankíxin sín chrónóehé sín tí ch'ín Jesús a kixin sáchrókjuixin ch'án ntiha.

18 A ntá ó ts'it'ótjen ch'ín Jesús tí ntabárcō na ntá tí ch'ín k'uéchónta nchakuen tí jínahya na mé chrónòa ch'án kixin kjaxin ch'án sáchrókjuiko sín ch'án, ichro ch'án.

19 Ntá ch'ín Jesús kjuanjonhya ch'án kjuachaxin sátsjiko sín ch'án. Náhí. K'uetōan ch'án kixin:

—Sátjia ntōa tjíchenka tí sín naxa kjéhya tí jaha kixin nkexrí kaín tí kjuaxroan jié kjuasin Dios kjuínchekitōha jína kuikonóaha ch'án tí jaha —ichro ch'án.

20 Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kixin nkexrí

kaín tí nkehe kjuích'e ch'ín Jesús kjuínchekitohe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Lc. 8.40-56)

²¹ Ntá tió xíkjan_{ka}o ch'ín Jesús tí ntabárc_o tóhe tí ntayaon ínaá ntá kóchjina nchónhya chojni ntá ntahó chrínta nta kuítóhe ch'án ínaá.

²² Na ntá ikui ijnko ch'ín t'etoan kuènte n_{in}ko mé it'in ch'án Jairo. A ntá tió k'uíkon ch'án kixin itjen ch'ín Jesús ntá kjuák'exín toch'in ch'án chrínkí t_oté ch'ín Jesús a

²³ imá chrónóeh_e ch'án kixin:

—Tí ijnko xjanna chjin ó tjet'en xjan. Xrjanóaha chrókju_{in}i chrókjuak'étja itjá chrítaón kja xjan ntá chrókuitohe xjan jína —ichro ch'án.

²⁴ Ntá ch'ín Jesús sákju_{ik}o tí ch'ín a. Na nchónhya chojni chréhe sín tinkák'ixitja sín ch'án ínaá.

²⁵ A ntá kjaxin tjenkákjan sín ijnko chojni chjin níhi tjan, ó chón_ta teyó nánó sítji tjan jni.

²⁶ Imá tjote tjan kixin nchónhya chojni kjuanjon xro_{an} kónhen tjan na ó kjuixin kjuèhe tjan kaín xín nkehe k'uéchón_ta tjan. Ó jehí titoehya tjan jína la íchá ntsí tinkákótao tjan.

²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án,

²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuitohe tjan jína, ichro tjan.

29 Ntá tuénxín tí nj̄i na mé ó kjuixié tjan la ko kónohe tjan ḱixin ó kjuixin kuítóhe tjan j́ina ti chin k'uéchón̄ta tjan.

30 Ntá ch'ín Jesús na ó kónohe ch'án ḱixin kjuachaxién ch'án mé kuítóexín ijnko chojni j́ina ntá kuinkátjía ch'án kjuanchankíhi ch'án tí chojni síin a ḱixin:

—¿Nkexro kuákóx̄in tí kaná? —ichro ch'án.

31 Ntá kjuátēhe tí sín k'uajiko ch'án a ntáchro sín ḱixin:

—Ó noha ḱixin nchónhya chojni sítja, ¿ntá nkekuènté ḱixin nax̄a tjanchankiá ḱixin nkexro tí kuákóx̄ian? —ichro sín.

32 Ntá kuinkátjía ch'án tsjehe ch'án nkuixín ḱixin tsonohe ch'án nkexro tí kuákóx̄in tí ké ch'án.

33 Ntá tí tjan a na mé chrakon tjan síxrànk̄a tjan ó nohe tjan ḱixin ó kuítóhe tjan j́ina ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan.

34 Ntá ntáchro ch'ín Jesús ḱixin:

—Xjeenni, kaín asán kuinkachónkia tí janhan ntá kuítóha j́ina. Ijie la kjuaxróxin sátsjia nt̄ōa la ó kuítóha j́ina a —ichro ch'án.

35 Na ntá nax̄a tjenixja ch'án ntá ó kui chojni kuix̄in sín nt̄ōe tí ch'ín t'et̄oan tí n̄inko. Ntá chénka sín ch'án ḱixin:

—Xjaan na ó kjuixin k'uén. ¿Nkekuènté nax̄a chjehé xr̄a tí Maestro a? —ichro sín.

36 Ntá ch'ín Jesús na ántosén ch'án tí chrónka sín ntá nixjehē ch'án tí ch'ín t'et̄oan tí n̄inko ntáchro ch'án ḱixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'in Jacobo, sátsji sín.

³⁸ Na ntá tió kjuíji sín tí ntøe tí ch'ín t'etøan tí n̄n̄ko na k'uikon sín kixin imá sítjité sín tsjankàma sín tí xjan a.

³⁹ Ntá k'uixenhen ch'ín Jesús nchia kjuanchankí ch'án kixin:

—¿Nkekuènté ánta tjasitérá tsjankàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'ueṭoan ch'án kixin kaín sín sátsji sín ntója. Ntá kjuíko ch'án tí it'é la ko tí ìné xjan la ko tí iy'á sín xriko ch'án ntá k'uixenko sín ch'án tí tjen tí xjan a.

⁴¹ Itsé ch'án tja xjan ntá nkívee xjan mé nixjèexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuanhan kixin t'àya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uikon sín xíkaha.

⁴³ Ntá fuerte k'ueṭoan ch'ín Jesús kixin chróchenkahya sín ninkexró. La kjaxin k'ueṭoan ch'án kixin tsjanjon sín nkehe sine tjan.

6

*Ch'ín Jesús kjuák'e ch'án chjasin Nazaret
(Mt. 13.53-58; Lc. 4.16-30)*

¹ A ntá chr'éxín k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án.

² Na ntá tió kui tí yaon t'ok'éhe sín ntá kjuankíxin ch'án kjuakoxin ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxra_ohe tí ch'ín i kaín tíhi? ¿Nketí kuixin tí kjuaxrexinkaon chón_ta ch'án la ko tí kjuaxroan tjasin ch'án?

³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra₂ tahya sín kuentá nkerí ch'e ch'án.

⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntøe ch'án na mé tjikosáyehya sín ch'án —ichro ch'án.

⁵ Méxra₂ ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitøhe ch'án sín jína.

⁶ Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankíxin k'uøtuønen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chón_ta chojni.

⁸ La ko k'uetoan ch'án kixin ninkehó tsjikohya sín kuènte ntia. Jehó tí nta tjixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon.

⁹ Na ko tokate ó tsjanka sín la ko tsjiko sín jehó tí ka tjejóya sín ó.

¹⁰ Kjaxin ntáchro ch'án kixin:

—A ntá tí ts'ixenhénrá ijnko nchia a ntá ntaha tsjanjon sín kjuachaxin na ntahó chókuítóhará. A ntá tsjixinjian tí xra ntá sátsjixinrá ntiha.

¹¹ Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákoherá sín na ntá t'axrxéxinrá tí chjasin a ntá ts'oxènjínrá tí nche chóna totárá kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitoexín ijie chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuitóxinhin sín ntie sín.

¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kujkite sín itsjé chojni níhi a la ntá kuítóhe sín jína.

*Ik'uén ch'ín Juan Bautista
(Mt. 14.1-12; Lc. 9.7-9)*

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhē tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etoan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanchia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án.

¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya

²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan.

²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehē ch'án tí síxreé la ko tí sín k'uētuēnhen tí

sín soldado la ko tí sín t'et̥oan estado Galilea kixin itsi sín nt̥oē ch'án kixin síin kia.

²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'in Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'et̥oan ch'án.

²⁴ Ntá jehe tjan na mé kuínhin tjan ntá sákjuí tjan chénka tjan ìné tjan kixin tsíntáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehē ch'án, la ntá xitjahya tsontáchro ch'án “Náhi” tí nkehe kjuanchia tjan.

²⁷ Na ntá tuénxín k'uetuēnhen ch'án ijnko ch'ín soldado kixin tsjik̥ao ch'án tí kja ch'ín Juan a.

²⁸ Ntá tí ch'ín soldado mé sákjuí nt̥oēchiso, ntá kóchrínjin ch'án ikja tí ch'ín Juan a. Ntá ijnko plato

kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan ìné tjan.

²⁹ Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpoe ch'án ntá kjuikao sín ntá sákjuíkjavá sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'uájiko ch'ín Jesús a na mé ókjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín.

³¹ A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásítji la ko síti nchónhya chojni na ntá xrankahya ts'ejó sín sine sín.

³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcō sákjuí sín ijnko nonte jehó tjen.

³³ Na ntá itsjé chojni k'uíkon sín kixin sákjuí sín la ko kjuátsōan sín kixin ch'ín Jesús. Ntá xrákuaxin sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús.

³⁴ Ntá k'uínkajinxin ch'án tí ntabárcō, a ntá k'uíkon ch'án kixin nchónhya chojni síin ntiha ntá kuikonóehe ch'án tí jehe sín na mé éxí yóhe kolélo tjejó sín chóntahya va nkexro ts'ayakonhen va. Ntá kjuankixin ch'án kjuakohe ch'án sín nchónhya nkehe a.

³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi

³⁶ na ntá jaha chrókuítóhé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kixin:

—Chjéhe sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjéheni sín sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín niotja chontará? Sátjítsehérá —ichro ch'án.

Ntá sákjuítsjehe sín na ntá chrónka sín kixin:

—In'ó niotja la ko yaá koche mé siín —ichro sín.

³⁹ Na ntá k'uetóan ch'án kixin kaín xín sín chrók'uixitjaxín sín tí chrítaón tí ka yoa a.

⁴⁰ Na ntá xíkaha kójnkojié sín ciento sín la ko cincuenta sín k'uixitjaxín sín.

⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ó ch'án tot'ó tí niotja a ntá chjéhe ch'án tí sín k'uájiko ch'án kixin ts'óxikayehe sín sine tí sín siín a la ko kjaxin kóchrít'ó ch'án tí yaá koche ntá k'óxikayehe sín kixin sine sín kaín sín.

⁴² Ntá kaín xín sín kjóne sín kókjehe sín.

⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ó tí niotja la ko tí koche tsíxehe.

⁴⁴ A ntá tí sín kjóne na mé in'ó mil chojni ntoa.

*Ch'ín Jesús mé tjítaón ntayaon
(Mt. 14.22-27; Jn. 6.16-21)*

⁴⁵ A ntá tuénxín k'uetuēhen ch'ín Jesús tí sín k'uájiko ch'án kixin ts'it'ótjen sín tí ntabárcō a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxā kuítóhe ch'án nixjehe ch'án kaín tí sín siín a.

⁴⁶ Kjuixin nixjehe ch'án sín na ntá jehe ch'án chrìn ch'án ijnko jnā tsonixjeexín ch'án Dios.

⁴⁷ A ntá tió k'uúxin tie ntá tí ntabárcō na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon.

⁴⁸ Ntá kotohe ch'án k'uúkon ch'án kixin imá xra tjiko sín tí ntabárcō a kixin tí xríntō imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án.

⁴⁹ A ntá tí k'uúkon sín kjuítaón ch'án ntā, ntá kjuenkayáxin sín kixin kjuacha sín, ichro sín, ntá k'óyako sín

⁵⁰ kixin kaín sín k'uúkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xríntō la ó k'uúxratá. Ntá imá chrakon sín kixin xíkaha kónhen

⁵² kixin kienxínhya sín tí kjuaxroan kjuích'e ch'án kuènte tí niqtja kixin naxā kénhya asén sín kuinkáchónki sín ch'án.

Ch'ín Jesús mé kjuínchekitohe jína tí chojni níhi tí nonte Genesaret
(Mt. 14.34-36)

⁵³ Ntá tió k'uátòye sín tí ntayaon ntá kjuíji sín tí nonte Genesaret ntá kjuak'e chroe sín tí ntabárcɔ a tí chrínta ntá.

⁵⁴ Na ntá tió k'uínkajinxin sín tí ntabárcɔ, a ntá tí sín síin ntiha tjoka kjuátsoan sín tí ch'ín Jesús.

⁵⁵ Ntá sákjuí sín nkuíxín chjinaxón ntiha kjuankíxin sín kuikao sín tí sinníhi tinkátsénkí sín kuikao sín tí tjen ch'ín Jesús.

⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sinníhi a chrínta ntá. Na ntá chrónóehe sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita asén chojni
(Mt. 15.1-20)

¹ A ntá iso sín fariseo la ko iso tí sín tjako tí ley kuixin sín chjasin Jerusalén ntá kóchjinehe sín tí ch'ín Jesús.

² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a.

³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxí k'uékjich'e tí sín táda ósé kixin ná t'óntó itja sín ntá sine sín.

⁴ Na ko tí tsokjanxin sín ntasin ná t'ónti sín ntá sine sín. Na ko kjaxin itsjé í so nkehe tinkáchónki

sín, éxí tjonemá sín tí vaso t'iyá sín nkehe la ko tí nchésen la ko tí ch̄i chjányan nkehe ne sín la ko tí kámé sín nchetjóá sín.)

⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuèté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchronka ch'ín Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etōan chojni ó.*

Mé xikaha ichro itén Dios.

⁸ Ntá jahará kuitohérá tí nkehe tsík'etōan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'iará nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha titohérá ntáha tí nkehe tsík'etōan Dios.

¹⁰ Tsintáchro ch'ín Moisés kixin: “Tsochonteherá kjuasáyé it'ará la ko ìnará”, la ko “A ntá tí nkexro t'ántaxínhin it'é o ìné la chrók'óyán sín.”†

* **7:7** Isaías 29.13 † **7:10** Éxodo 20.12; 21.17

11 **A** ntá jahará ntáchrórá kixin ó nchoxon kixin ijnko nkexro tsochénta it'é la ko ìné kixin: “It'éni, Ìnéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios).

12 **A** ntá xikaha jnkójín nkexro tsontáchró ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí ìné ch'án.

13 **A** ntá tí xikaha la títóhérá tí nkehe tsík'etoan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

14 Na ntá k'uíyehé ch'ín Jesús tí chojni ínaá ntáchró ch'án kixin:

—Tinhínrá kaín rá tí nkehe ntáxrjan la ko tiénxinrá.

15 Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha.

16 Tí tjinkáonrá chrókuinhínrá la chrókuinhínrá —ichro ch'án.

17 **A** ntá tió kuítóhe ch'án kaín tí sín tsíkóchjina a na ntá jehé ch'án la ko tí sín k'uájiko ch'án mé k'uíxehen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a.

18 Na ntá ntáchró ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie

19 kixin jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kixin tí nkehe sineni la jehya jie.

20 Ntá ntáchró ch'ín Jesús kixin:

—A ntá tí nkehe t'axrjeníxin chojni na mé jie táha.

²¹ Nkaya asánrá mé t'axrjeníxin tí jínahya tjenkayáxinrá, la ko tí tjachēhe kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá

²² la ko tí chrókuđerá, la ko tí tjaké asánrá tí nkehe chóna ókjé sín, la ko tí jínahya ch'ehérá kichuárá, la ko tí kjuach'ia xríkoará la ko tí jínahya tjenkayáxinrá, la ko tí chjinóxinhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína.

²³ Kaín tí nkehe jínahya a mé t'axrjeníxin chojni, la mé tjasixín sín jie.

Ijnko tjan tsíkjixin kjín mé kuítekaon tjan tí ch'ín Jesús

(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakon-hya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha.

²⁵ Na ntá ijnko ìné ijnko tjan tjarisoá chóna ijnko nchakuen tí jínahya mé kuínhin nkehe tí xra ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús.

²⁶ Na mé jehe tjan tsíkjixin kjín, na mé tsíkjixin tjan nó nación Sirofenicia. Na ntá jehe tjan a mé kui tjan chrónóēhe tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

27 Ntá ntáchro ch'ín Jesús kjuátehe ch'án kixin:

—Títohé senó chrókjóne tí xjan. Jehya tí jína chrókuakítsjaha xjan tí niotja ntá chrótjaha konia chrókjóne va —ichro ch'án.

28 Ntá jehe tjan kjuátehe tjan ntáchro tjan kixin:

—Chaxín xikaha, Inchéni. Kjánchó kjónté tí konia tjejoyánkí mesa ine tí tot'o niotja tóxènjín tí chánjan —ichro tjan.

29 Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kixin tí nchakuen tí jínahya ó k'uaxrjexín tí xjaan —ichro ch'án.

30 A ntá tió kjuíji tjan ntøe tjan, na ntá k'uikon tjan kixin tí xjeen tjan na mé ó ntoá tjetsínkaták'á xjan tí cama kixin ó tsík'axrje tí nchakuen tí jínahya a.

Ch'ín Jesús mé kjuínchekitohe jína ijnko ch'ín tienhya la ko nixjahya

31 Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

32 Ntá kuikao sín ijnko ch'ín tienhya na ko ntoáhya nixja ch'án. Ntá chrónógehe sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitøhe ch'án jína.

33 Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxènhen ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxín ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kixin: —Efata —mé t'axrjexín nkívee sín kixin: ¡Tsoxit-jehe!

³⁵ Na ntá tuénxín xítjehe tatsjon tí ch'ín tienhya ntá kuínhin ch'án la ko kuítóhe jína tí nejen ch'án, ntá jína nixja ch'án.

³⁶ Ntá ch'ín Jesús k'uętoan ch'án kixin ninkexró tsochenkahya sín. Ntá kjónté imá k'uętoan ch'án ntá ántosén sín kjónté íchá xrichronka sín.

³⁷ Na mé imá chrakon sín ntá ntáchro sín kixin: —Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni

(Mt. 15.32-39)

¹ **A** ntá ijnko yaon nchónhya chojni k'uúxikóchjina ínaá. **A** ntá chóntahya sín nkehe sine sín. Na ntá ch'ín Jesús mé k'uúyehē ch'án tí sín k'uájiko ch'án, a ntá ntáchro ch'án kixin:

² —Imá tikonóaha kaín tí sín i kixin ó ní yaon tjékian sín ntihi ntá chóntahya sín nkehe sine sín.

³ Ntá chrókuétuanhya sín sáchrókjui sín ntōe sín tí naxa nehya sín kixin ntia ó chrókótiénxin sín kixin iso sín la imá kjín tsíkjixin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ò ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayēhe sín tsakja kaín xín tí sín siín a.

⁷ Na ko iso koche ntsíntsi chóna sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxíkayēhe sín kjaxin.

⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'ò tí nkehe tsíxehe.

⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín

¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárcō a sákjuí sín nó tí nonte Dalmanuta.

*Tí sín fariseo tjanchia sín ijnko kjuaxroan jié
(Mt. 16.1-4; Lc. 12.54-56)*

¹¹ Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuēnte nkaya nkajní kixin tjinkaon sín chrókjuachaxin sín ch'án.

¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

13 Na ntá kuítóhe ch'án tí sín a, ntá xík'it'ótjen ch'án tí ntabárc̣o ntá sákjuí ch'án í jnko tóhe ntayaon ínaá.

*Tí xroaṅ nchek'ánkí tí niotjé tí sín fariseo
(Mt. 16.5-12)*

14 Ntá k'uitjáyenhen sín tsíkjikohya sín nkehe sine sín. Jehó jnkokoá niotjā chóna sín nkaxenhen tí ntabárc̣o a.

15 Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroaṅ nchek'ánkí niotjé tí sín fariseo la ko niotjé tí ch'ín Herodes a —ichro ch'án.

16 Ntá tí sín xriko ch'án mé kjo sín kichó sín kixin:

—Mé xíkaha ichro ch'án kixin tsíkjikohyani niotjā.

17 Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuèté tjórá kixin chontahyará niotjā? ¿Á naxa tiénxinyará la ko naxa noahyará? ¿Á kénhya asánrá tinkachónkirá Dios?

18 ¿Á t'ikonxinyará ikonrá la ko á tiénxinyará tátsjinrá? ¿Á xráxinkákonhyará?

19 Tió kóchrít'vā tí n'ó niotjā kjóne in'ó mil chojni na ¿nkekjaín ntaxra tí tot'ò niotjā naxa kjuenájinná? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

20 Xíntáchro ch'ín Jesús ínaá kixin:

—Na ko tí kóchrít'vā tí yato niotjā kjóne noó mil chojni na ¿nkekjaín ntaxra tí tot'ò niotjā kjuenájinná? —ichro ch'ín Jesús.

Ntá ntáchro sín kixin:

—Yato ntaxra —ichro sín.

21 Ntá ch'ín Jesús ntáchro ch'án kixin:
—Kjónté xikaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jína ijnko ch'ín t'ikonhya tí chjasin Betsaida

22 A ntá chr'éxin kjuíji sín chjasin Betsaida, a ntá ikui iso sín kujukao ijnko ch'ín t'ikonhya. Ntá chrónóehé sín tí ch'ín Jesús kixin chrókjuinchekitóhe ch'án jína tí ch'ín a.

23 Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kujukitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

24 Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

25 Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uíkonhya kuítóhe ch'án jína la jína t'ikon ch'án kaín nkehe.

26 Na ntá ch'ín Jesús mé k'uetuēhen ch'án tí ch'ín k'uék'ikonhya kixin sátsji ch'án ntóe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

27 A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan?
—ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín ínaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátēhe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'ueṭoan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)*

³¹ Na ntá kjuankíxin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte nínko la ko tí sín t'etōan kuènte tí sín nchat'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án ínaá.

³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án.

³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhí. Jaha tjenkayáxian éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyehé ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkojínrá tjinkáonrá tsochréhérá tí janhan na t'ichjánxin tsítóhérá kaín tí nkehe tjaké asanrá na ntá tsamará tí ntacruz kuéntará, a ntá tsochréhérá tí janhan.

³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá.

³⁶ ¿A ntá nkehe tsonhen tí chrókjuacha ijnko chojni chróchónta kaín nkehe siín chjasintajni, a ntá kjuachón chrókjuinçek'itjáyan?

³⁷ ¿Nkehe chrókjuenká chojni kixin chróchónta tí kjuachón?

³⁸ A ntá jnkojín nkexro tsosuehé kixin tinkáchónki tí janhan la ko tí tan kuéntana nkayakon tí chojni jínahya chóna jie la kjaxín tí Xjeen Dios K'óna Chojni tsosuehé ch'án tsontácho ch'án kixin chóxin ch'án tí jehe sín tió tsokjan ch'án tsikáo ch'án tí kjuachaxin jié kuènte It'é la ko tsikáo tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjiará itsi tí kjuachaxin ts'etqan Dios —ichro ch'án.

*Ch'ín Jesús mé k'uíxitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko

ch'ín Juan sákjuj sín jehó sín ijnko jna noi. Ntá ntiha mé xrínahya k'uúixitoxin ókjé nkexrí tsjehe ch'án k'uúikon tí jehe sín.

³ A ntá iké ch'án tsík'óna imá tjákini la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xikaha.

⁴ Na ntá titàya k'uúikuèn sín ntiha itjen tí ch'ín Elías la ko tí ch'ín Moisés tjejóto sín tí ch'ín Jesús.

⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókuich'énani iní nchia la mé ijnko kuéntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án.

⁷ Na ntá xrínahya ikui ijnko tjuj kjuák'etja chrítaón kaín xín tí tjejó sín. Na ntá chríkjan tí tjuj kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuúxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uúinkajinxin sín tí jna ntá k'uetōan ch'ín Jesús kixin tsochenkahya sín ninkexró tí nkehe k'uúikon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uúikon sín. Na ntá jehó sín mé tjejóto sín kixin nkehe

t'axrjexín tí nkehe chrónka ch'án kixin tsoxechón ch'án inaá.

¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsotjinkakonhya sín.

¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xíkaha tsonhen —mé xíkaha chrónka ch'ín Jesús.

Ch'ín Jesús mé kjuínchekitøhe jína ijnko xjan chóna ijnko nchakuen tí jínahya

(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín.

¹⁵ A ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án.

¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjóra tí sín i? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chón̄ta nch̄akuen tí jínahya na mé nchenixjahya xjan.

¹⁸ Kjónté nkerí tjen xjan la tí nch̄akuen tí jínahya mé tjáka xjan nonte, ntá nt̄alóxr̄jo sít̄ix̄in ir'va xjan na netaón xjan neno xjan na méx̄ra t̄jehya xjan. Ntá xr̄janóaha tí sín xrikoa kíxin chrókuakitsje sín tí nch̄akuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kíxin:

—Jahará chojni kénhya asánr̄a tinkachónkirá Dios. ¿Xá hasta nkesá tjinkáonr̄a nax̄a ts'ejóni? ¿Xá hasta nkesá tsjácha tsjak'é tsjákohará? Xrákōar̄a ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nch̄akuen tí jínahya mé k'uíkōn tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sít̄ji nt̄alóxr̄jo ir'va xjan.

²¹ Ntá ch'ín Jesús mé kjuanchankíhi tí it'é tí xjan a ntáchro ch'án kíxin:

—¿Á ósé x̄ikaha tónhen xjan? —ichro ch'án.

Ntá ntáchro tí it'é tí xjan kíxin:

—Desde nax̄a xjanntsí xjan.

²² A ntá jnkoyaxón tí nch̄akuen tí jínahya a mé tjákáte xjan xrohi la ko tjákánkí xjan ìnt̄a kíxin tjinkaon chrók'óyán tí xjan a. A ntá jaha ¿á tsjácha tsjínk̄itsani? La t̄ikonóehéni tsjínk̄itsani —ichro ch'án.

²³ Ntá ntáchro ch'ín Jesús kíxin:

—¿Nkekuènté tjanchankina kíxin á tsjácha? Tí tsitekávan la kaín nkehe la jína tsonhen, kíxin tí nkexro tsitekaon Dios la jína tsonhen kaín nkehe —ichro ch'án.

24 Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkĩtsani kixin antsí má tsitekaonni tí jaha —ichro ch'án.

25 Ntá k'uíkón ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya inaá —ichro ch'án.

26 Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjexín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín.

27 Na ntá ch'ín Jesús mé tséhe tja tí xjan kjuínchek'inkatjen ch'án xjan.

28 Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuèté kixin kjuachahyani kuakitsjeni tí nchakuen tí jínahya a? —ichro sín.

29 Ntá ntáchro ch'án kixin:

—Tíhi la t'ichjánxin kixin nchónhya tsochronóhérá T'aná la ko sintehyará —ichro ch'án.

*Yóxin chrónka ch'ín Jesús kixin its'en ch'án
(Mt. 17.22-23; Lc. 9.43-45)*

30 A ntá tió sákjuixin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonhe sín

³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsoxechón ch'án inaá —ichro ch'án.

³² Ntá jehe sín mé kienxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjexín tíha.

¿Nkexro tí imá tje_oan?

(Mt. 18.1-5; Lc. 9.46-48)

³³ Ntá kjujíi sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

³⁴ Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'et_oan.

³⁵ Ntá ch'ín Jesús mé kjuák'etj_axin ch'án ntá k'uíyeh_e ch'án tí teyó sín k'uájiko ch'án, a ntá ntáche ch'án sín kixin:

—Tí jnkójínrá tjinkáonrá chrókuét_oanrá má ntá t'ichjánxin kixin tsjixixín tsochréh_erá kaín sín, ts'ítuanhanrá la ko tsjínk_itsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójín nkexro chrók'uáyéh_e ijnko chánjan kixin tinkáchónki sín tí janhan la mé xikaha chrók'uáyéh_e sín tí janhan la ko kj_axin éxí chrók'uáyéh_e sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkĩtsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkonní ijnko chojni na mé kjuachaxin ihniá mé takitsjexín ch'án nchakuen tí jínahya chónṭa chojni. Ntá k'uetuēnhenni ch'án kixin xikahya chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté t̄itohé ch'án kixin ninkexró tjasixín kjuaxroan kjuachaxin n̄ina la tuénxín chrókjuacha chrók'uántax̄na sín.

⁴⁰ Tí nkexro ninkakuenhyani la mé tjinkĩtsa tí jeheni.

⁴¹ A ntá jnkójín nkexro tsotjáhará kjónté ijnko vaso ìnt̄a tsjanjonxín sín n̄ina kixin jahará la tinkachónkirá Cristo, ntáxr̄jan kixin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² 'A ntá jnkójín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jina chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án nt̄ayaon.

⁴³ A ntá tí itjá t̄jásixián jie na mé íchá chrókójina chrókochrínjian kixin kjónté jnkokoá t̄já mé tsochontaxián kjuachón. A ntá tí yóí t̄já la tíha mé sáchrókjuixian tí siín xrohi xitjahya ts'an̄ka,

⁴⁴ tí siín kos̄int̄o t'enhya la ko síche xrohi ts'ankahya.

⁴⁵ A ntá kjaxin tí totá tjásixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuíxian tí siín xrohi xitjahya ts'anka,

⁴⁶ tí siín kosinto t'enhya la ko síche xrohi ts'ankahya.

⁴⁷ A ntá tí ikuan tjásixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yóí kuan la tíha mé sáchrókjuíxian tí síche xrohi

⁴⁸ tí siín kosinto t'enhya la ko siín xrohi ts'ankahya.

⁴⁹ 'A ntá kaín nkexro t'ichjánxin tsjasóte. A ntá kaín nkehe ts'áyéhe Dios chóna xijnta.

⁵⁰ Tí xijnta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxí xijnta kixin kjuaxróxin chrók'uejokoará kíchuará —ichro ch'án.

10

*Tjako ch'ín Jesús kixin chrókjuákehya kichó sín
(Mt. 19.1-12; Lc. 16.18)*

¹ Na ntá ch'ín Jesús mé k'uaxrjexín ch'án chjasin Capernaum sákuí ch'án nó estado Judea la ko nó tóhe ntario Jordán. Ntá nchónhya chojni kójnkotsé sín tí tjen ch'án ntiha. Ntá kjuakohe ch'án tí jehe sín kixin xikaha kuèhen ch'án.

² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntá chro sín kixin:

—¿Á siín kjuachaxin tsjákehē chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'ueṭuaṅhanrá tí ch'ín Moisés?
—ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjíexín kíchó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha aṣánrá titekákonhyará ntá k'ueṭoan ch'án ts'óna tí xroon a.

⁶ Kjánchó tí xrankíxixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.*

⁷ Méxra tí chojni ntoa tsítóhe ch'án tí it'é ch'án la ko ìné ch'án kixin tsakja ch'án ichjién ch'án

⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.†

⁹ Na mé xíkaha tí kjuachaxin kuènte Dios kójnkojiéxin sín ntá jehe sín chrók'uitjéhya kíchó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kíchó sín.

¹¹ Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xíkaha tsjáchehe ch'án tí tjan tsíkótehe ch'án saoxín.

¹² La ko kjaxin tí chojni chjin tsíkjákehe xìi tsakja tjan í jnko chojni ntoa na mé xíkaha kjaxin tjan tjasin tjan jie —ichro ch'án.

* **10:6** Génesis 1.27; 5.2 † **10:8** Génesis 2.24

Ch'ín Jesús kjuíncheyaon ch'án xjan
(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkao xjan.

¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté t̄t̄ohérá tí xjan tsoxrakoa tí tjén janhan la t'ínkakuēnhyará xjan kixin tí sín kuēnte kjuachaxin kuēnte Dios la mé tóyóhē éxí tí xjan a.

¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'et̄oan Dios tí kjuachaxin kuēnte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehē ch'án tí ch'ín Jesús
(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro mé jína la tíha mé Dios.

¹⁹ Ntá jaha ó noha kixin nkexrí k'uet̄oan Dios kixin: “Chrókjuacheéhya kichuá la chrók'oyánhya chojni la chrókueehya la chrókjóntahya kichuá la chrókjuich'iahya la ko chróchontehé kjuasáya it'á la ko ìná”‡ —ichro ch'án.

‡ 10:19 Éxodo 20.12-16; Deuteronomío 5.16-20

20 A ntá jehe ch'án kjuátēhe ch'án ntáchro ch'án kixin:

—Maestro, kaín tíha kjuínchexiteyáni desde nta-soáni —ichro ch'án.

21 Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

22 Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

23 Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etōan —ichro ch'án.

24 Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etōan.

25 Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etōan —ichro ch'án.

26 Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

27 Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Ínchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

²⁹ Ntá kjuátēhe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntōe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón

³⁰ na mé ntihi chjasintajni tsochónta sín ciento veces nchónhya ntōe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nontee sín xikaha ts'ikon sín itsjé nonte. Kjonté tsjasóte sín ntihi chjasintajni ntá chr'éxín tsochónta sín tí kjuachón jnkochrín.

³¹ A ntá itsjé tí sín t'etōan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etōan sín tí ntiha.

*Níxin chronka ch'ín Jesús kixin its'en ch'án
(Mt. 20.17-19; Lc. 18.31-34)*

³² Ntá tjejótji sín chrìn sín tí ntja sátsji chjasin Jerusalén. Ntá ch'ín Jesús mé tjetaón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyēhe ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án.

³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchát'á t'etōan la ko tí sín tjako tí ley. Ntá ts'etōan

sín kixin its'en ch'án. Ntá sinchek'áyéhe sín ch'án tí sín jehya judío.

³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon nixin mé tsoxechón ch'án inaá —mé xikaha ichro ch'ín Jesús.

*Ch'ín Jacobo la ko ch'ín Juan tjanchia sín nkehe
(Mt. 20.20-28)*

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá

chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankíxin kónínkakonhen sín tí ch'ín Jacobo la ko tí ch'ín Juan.

⁴² Ntá k'uíyehē ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etōan chjasintajni la imá t'etuenhen sín kaín chojni la ko tí sín imá tjetōan mé imá nchehnkehe asén sín kixin ihyé sín ts'etōan sín.

⁴³ Kjánchó jahará la xikahya chrókjuich'erá. Náhi. Tí jnkójnra tjkáonra chrókuétōanra la chrókjuínkítsará tí í so sín.

⁴⁴ A ntá tió jnkójnra antsí chrókuétōanra mé t'ichjánxin senó chrókjuákoxinra chrókjuich'eherá kíchuára xra.

⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhi. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

*Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jína
(Mt. 20.29-34; Lc. 18.35-43)*

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxin ch'án chrínta ntia tjanchak'á ch'án.

⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóhéni —ichro ch'án.

⁴⁸ Ntá nchónhya sín k'uetuēnhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóhéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyēhe sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chríka k'uínkatjen ch'án kóchjinehe ch'án tí tjen ch'ín Jesús.

⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

*Ntá ch'ín Jesús k'uixenhen ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuenhen ch'ín Jesús iyó tí sín k'uájiko ch'án,

² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasíntankehéra va ntá tsjikoanará va ntihi.

³ A ntá tí jnkójín chojni tsjanchankíhará sín kixin nkekuénté xikaha ch'erá ntá tsontáchrora kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va.

⁵ Ntá iso tí chojni tjejó ntiha kjuanchankí sín kixin:

—¿Nkekuénté xikaha ch'erá tjasíntankehéra tí kolócho a? —mé chro sín.

⁶ Ntá kjuátexín sín éxí k'uetuan ch'ín Jesús. Ntá kjuanjon sín kjuachaxin sátsjiko sín va.

⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús.

⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráqo sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankíxin sín itsje sín chéhe sín ntáchro sín kíxin:

—Tsjancheheni kjuasáyé Dios. Jína tí nkexro kuixin kjuachaxin ihnié Inchéni.

¹⁰ Jína tí kjuachaxiэн Dios itsi mé ts'etuenhen tí nkexro k'uaxrjeníxin it'eni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí nínko jié tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakonhen ch'án ijnko nta t'óna to higo tsík'ónahya to

(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta.

¹³ Ntá k'uíkon ch'án kjín kíxin itjen ijnko nta t'óna to higo itsá kayoa. Ntá sákjuítsjehe ch'án tí nta kíxin ákué tsahya to. Ntá k'uíkon ch'án kíxin jehó ka itsa tí nta a kíxin jehya tí yaon ts'óna to.

¹⁴ Ntá nixjehe ch'ín Jesús tí nta t'óna to higo k'uetuenhen ch'án tí nta kíxin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án nínko

(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen nínko a. Ntá kjuankíxin ch'án k'uinkité ch'án tí sín nchekjixín nkehe ntiha

la ko tí sín t'ena nkehe ntiha. A ntá kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá

¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín n̄inko.

¹⁷ Ntá kjuakohé ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkjiçh'énará itjueé xíchee* —ichro ch'án.

¹⁸ Ntá tí sín nçat'á t'etõan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjinhin tí chojni tí nkehe kjuako ch'án.

¹⁹ Kjánchó ntá ó kontó ntá k'uaxrjexín ch'án tí chjasín a sákuí ch'án.

Ó tsíxámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uikon sín kixin ó tsíxámáxin nuèe tí nta.

²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakhén jna na ó tsíxámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios.

²³ Chaxín ntáxrjan kixin jnkójínrá chróntácherá tí jna i kixin: “Sátjixián ntihi tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrórá, ntá xíkaha chaxín tsonhen.

* **11:17** Isaías 56.7; Jeremías 7.11

24 Mé xíkaha ntáxrjan ḱixin kaín tí nkehe tsjancheherá Dios tí tsítekáonrá ḱixin chaxín ts'ayéherá ntá xíkaha tsonhen tsoxiteyá.

25 A ntá tió tjejonixjehérá Dios ntá jnkojín nkexro naxá ninkákonhénrá, la chrók'uitjáyanhanrá tíha ḱixin It'ará tjen nkaya nkajní kjaxin chrókjuinçek'itjáyan ch'án tí jie chontará.

26 A ntá tí sinçek'itjáyanhyará tí ijié chojni ntá It'ará tjen nkaya nkajní la kjaxin sinçek'itjáyanhya ch'án tí jie chontará.

Tjančankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

27 Ntá xíkjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nchat'á t'etoan la ko tí sín tjako tí ley la ko tí sín táda t'etoan njnko

28 kjuanchankíhi sín ch'án ḱixin:

—¿Nkehe tí kjuachaxin chonta jaha ḱixin xíkaha ch'e? ¿Nkexro tjáha tí kjuachaxin ḱixin xíkaha kjuich'e? —ichro sín.

29 Ntá kjuátehe ch'ín Jesús ntáchro ch'án ḱixin:

—Ntá kjaxin janhan tsjánčankíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan ḱixin xíkaha it'a.

30 ¿A ntá nkexro k'uetuēnhen ch'ín Juan ḱixin tsikite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

31 Ntá kjuanḱixin jehó sín tjo sín kíchó sín ḱixin:

—Tí tsontáchroni ḱixin Dios tsík'etuēhen tí ch'ín Juan ntá tsjanckh'í tí ch'ín a ḱixin nkekuèté kuítekakuenhyani ch'án.

³² ¿Á chróntáchroni ḱixin chojni ó tsík'etuēhen ch'án? —ichro sín.

Kjánchó chrakōnhen sín tí chojni chjasin ḱixin kaín sín kuítekaon sín ḱixin ch'ín Juan mé k'uénixja ch'án itén Dios.

³³ Ntá ntáche sín tí ch'ín Jesús ḱixin:

—Noehyani —ichro sín.

Ntá ntáchro ch'ín Jesús ḱixin:

—La ko kjaxin janhan tsōxrjankahya nkexro kjuanjon kjuachaxin ḱixin xíkaha t'á —ichro ch'án.

12

Ch'ín Jesús mé kjuíncheyóēxin ch'án éxí chojni ch'ehya xrajína

(Mt. 21.33-46; Lc. 20.9-19)

¹ Ntá ch'ín Jesús kjuíncheyóēxin ch'án inaá ntáchro ch'án ḱixin:

—Itjen ijnko ch'ín k'uēnkaxin ch'án itsjé ntanà t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tját'ò noi ḱixin ts'ít'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án ḱín.

² Ntá tí kjuixraká tí yaon ts'óna to ntá k'uētuēhen ch'án ijnko tí nkexro ch'ehe ch'án xra ḱixin sátsjikjanchehe ch'án tí sín ch'e xra jnkōsiné tí to tsakja ch'án.

³ Ntá tí sín ch'e xṛa mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án.

⁴ A ntá tí ìnché tí nonte mé xíchr'án ch'án tí í jnko nkexro ch'ehe ch'án xṛa. Ntá kjuíji ch'án ntiha ntá chjéhe sín ch'án xṛo kjuíncheníhi sín kja ch'án la ko k'uántaxínhin sín ch'án.

⁵ Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xṛa sákjuítsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chónṛa ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án.

⁷ A ntá tí sín ch'e xṛa a tjo sín kíchó sín kixin: “Tí ch'ín i mé ts'áyéhe kaín nkehe siín ntihi. A ntá jie ts'óyánni ch'án, a ntá jeheni ts'áyéhēni kaín tí nkehe a”, ichro sín.

⁸ Ntá xíkaha itsé sín ch'án k'óyán sín ch'án ntá kuakitsjexín sín ntōe ch'án tí nontēe ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xṛa, a ntá chróchjéhe ch'án ókjé chojni.*

¹⁰ ¿Á kjuínchekuáxinhyará jahará tí xroon itén Dios? Ntáchro xíkíhí:
Tí xṛo náxrjónhya kuítóenta tí sín ch'éna tjat'ō,
mé jie k'óna tí xṛo tjetōan.

* 12:9 Isaías 5.1-7

11 Mé xikaha kjuích'é Ìnchéni Dios,
na ntá tíha mé ijnko nkehe kjuachrakon k'uíkonní†
—ichro ch'ín Jesús.

12 Ntá chrótsé sín tí ch'ín Jesús chrókjuak'echjina
sín ch'án kixin kienxín sín kixin kaín tí ntáchro ch'án
la jehe ch'án k'uántaxínhin tí jehe sín. Kjánchó
chrakon sín kixin nchónhya chojni kóchjina ntá
kuítóhe sín ch'án ntá sákjuí sín.

*¿A jína chrókjuenkehe sín gobierno?
(Mt. 22.15-22; Lc. 20.20-26)*

13 A ntá ichr'án sín iso tí sín fariseo la ko iso tí sín
kuènte ch'ín Herodes kixin tsjanchankíhi sín ch'án
iso nkehe kixin tí ntoáhya chrókjuatehe ch'án ntá
jína chrók'ueka sín ch'án jje.

14 Ntá kjuíji sín tí tjen ch'ín Jesús ntáchro sín kixin:
—Maestro, ó noheni kixin tí nkehe chronka
la chaxín tíha la ko jehya nkexrí tsjehe chojni
tjenkayáxixián kixin á jína sín, la ko ntoá tjákua
ntie Dios. ¿Á jína chrókjuenkeheni tí gobierno tí
chichaon tjanchia? ¿Á chrókjuenkeheni sín ní o
náhí? —ichro sín.

15 Ntá ch'ín Jesús kjuátsoan ch'án kixin jehya jína
tjenkayáxin sín ntáchro ch'án kixin:

—Jehya jína kixin tjáchaxínrání. Xrákōará ijnko tí
chichaon tjanchia sín tsotsjáha —ichro ch'án.

16 Ntá xrákao sín ijnko tí chichaon tsotsjehe
ch'án. A ntá kjuanchankí ch'án kixin:

—¿Nkexro tí tsík'axrjexín tjenkání tí chichaon i la
ko nkexro ihnié chóna? —ichro ch'án.

Ntá jehe sín kjuátehe sín kixin:

—Tí ch'ín t'etōan mé tjenkání ch'án —ichro sín.

† 12:11 Salmo 118.22-23

17 Ntá kjuátehe ch'ín Jesús ntáchro ch'án kixin:
—Chróchjehérá tí ch'ín gobierno t'et̄oan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

*Kjuanchankí sín kixin á chaxín tsoxechón chojni
(Mt. 22.23-33; Lc. 20.27-40)*

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxín sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en.‡

20 Kjánchó k'uéjó yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín.

21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen ínaá.

22 Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan.

23 Ntá tió tsoxechón kaín xín chojni la, ¿Ntá nkexro ts'óna xì tjan kixin kayatoé sín tsíkótehe tjan? —ichro sín.

‡ 12:19 Deuteronomio 25.5

24 Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxiэн Dios.

25 A ntá tió tsoxechón tí chojni tsík'en la tsoteehya sín la ko tsjanjonhya sín xjeen sín kixin tsotehe sín kixin tí sín tsík'en la éxi sín ángel ts'ejó sín nkaya nkajní.

26 A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§

27 Méxra tí Dios i la jehya tinkáchónki tí sín tsík'en. Náhi. Jehе ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankírá —ichro ch'án.

*Tí nkehe antsí imá tjeoan tsík'etoan Dios
(Mt. 22.34-40)*

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjeoan tsík'etoan Dios? —ichro ch'án.

29 Ntá kjuátehe ch'ín Jesús ntáchro ch'án kixin:

—Tí nkehe antsí tjeoan tsík'etoan Dios mé tíhi: “Tinhínrá kaín rá chojni Israel kixin Inchéni Dios la mé jnkokoá la kohya í jnko nkexro.

§ 12:26 Éxodo 3.6

³⁰ Ntá kaín asánrá la ko kaín kjuaxrexinkaon kuèntará la ko kaín fuerza kuèntará chrótjuèxínrá.”* Mé xíkaha tí nkehe antsí tjetooan tsík'etooan Dios.

³¹ A ntá tí nkehe yóxin tsík'etooan Dios la mé tóyóhe na mé ntáchro xíkíhí: “Chrótjuèhérá kichuárá éxí tjuèxínrá asánrá,”† la kohya í jnko nkehe antsí má tjetooan tsík'etooan ch'án —ichro ch'ín Jesús.

³² A ntá kjuátehe tí ch'ín tjako nínko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡

³³ Noheni kixin kaín asénni la ko kaín kjuaxrexinkaon kuènténi la ko kaín fuerza kuènténi chrótjuèxínni Dios la ko chrótjuèheni kichó ni éxí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjetooan tíha —ichro ch'án.

³⁴ A ntá tió k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjínhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí nínko jié. Ntá kjuanchankí ch'án ntáchro ch'án kixin:

* **12:30** Deuteronomio 6.4-5 † **12:31** Levítico 19.18 ‡ **12:32** Deuteronomio 4.35 § **12:33** Oseas 6.6

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David?

³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétōan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétōan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uejókinhin sín kóxrjínhin sín tí nkehe kjuako ch'án.

*Ch'ín Jesús chrónka nkexrí ch'e tí sín tjako tí ley
(Mt. 23.1-36; Lc. 11.37-54; 20.45-47)*

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín.

³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen nínko. La ko kjaxin tió sátsji sín tí sine sín xritjeyá sín tí nta antsí náxrjón ts'ejóksen sín sine sín.

⁴⁰ La ko takitsje sín ntōe chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

* **12:36** Salmo 110.1

*Tí ofrenda kjuanjon ijnko tjan k'án
(Lc. 21.1-4)*

⁴¹ **A** ntá jnkonaá mé ch'ín Jesús tjetjaxin ch'án nkaxenhen ninko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a.

⁴² Ntá kjaxin ntiha mé kjui ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tjete sínkí.

⁴³ Ntá ch'ín Jesús k'uíyehē ch'án tí sín k'uájiko ch'án ntáchro ch'án kixin:

—Chaxin ntáxrjan kixin tí tjan k'án nòa tjan **antsí** tjete k'uíkon Dios tí chichaon chr'áxenhen tjan tí ntacajón, **a** ntá tí sín í so la kánhyó

⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchónta tjan chrók'uíte nkehe chrókjónē tjan —ichro ch'án.

13

*Ch'ín Jesús chrónka kixin tsoxíka ninko
(Mt. 24.1-2; Lc. 21.5-6)*

¹ **A** ntá tió k'uaxrjexín ch'ín Jesús tí ninko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kíchó, la kaín tíha la tsoxíka —ichro ch'án.

*Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)*

³ A ntá sákjuí sín chrítaón tí jnə Olivo chók'èxin tjen tí n̄nko a. Ntiha kjuák'etjəx̄in ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoexínni nkesá tsoxiteyá kaín tíha —ichro sín.

⁵ Ntá ch'ín Jesús kjuátəhe ch'án ntáchro ch'án kixin:

—Tóxakonhanrá t̄itoéhyará kixin ninkexró chrókjuít'ayahyará.

⁶ Nchónhya chojni tsi tsontáchro sín kixin jehe sín mé Cristo. Ntá x̄ikaha sich'iyehé sín nchónhya chojni.

⁷ A ntá tió tsinhínrá kixin tjanjonko kichó sín la t'óyán kichó sín la chrakonhyará tóxakuanhyará ó jehí tsonhen tíha. Kjónté x̄ikaha naxə tsjejehya chjasintajni.

⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankíxixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etəan ntá tí nkaxenhen n̄nko ntiha mé tsjatiaxínrá sín. Jahará t'ichjānx̄in tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

10 Tí naxa ts'itjáyanhya chjasintajni la mé t'ichjánxín tsinhin chojni kaín xín nación tí tan jína tsaáxin sín.

11 Tió sátsjikoará sín tsjikaánrá sín tí tjejó tí sín t'etoan, la tóxakuanhyará nkehe tsjateherá la ko nkehe tsjenkayáxinrá. Náhí. Chronkará tí nkehe kjuanjon Dios tsontáchrórá tí hora a, kixin jahyará tsonixjará. Náhí. Nchakuen Dios mé tsonixja.

12 Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko ìné la tsjikaán sín kixin its'en.

13 Kaínxín chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

14 Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchró profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrin sín jna tsjík'ejómá sín.

15 A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín.

16 Ntá tí sín tjejó nontee sín la í chrókjanhya sín naxa chrókjuikakja sín iké sín.

17 Ntá nòa tí chojni chjin ts'ejóyá tí yaon a la ko tí sín tjeónchekakí xjeen.

* 13:14 Daniel 9.27; 11.31; 12.11

18 Chrókjuancheherá Dios kixin jehya nchakuen kin chrókónhen tíha.

19 A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankíxixín Dios kjuích'éna ch'án chjasintajni la ko kjá xikahya tsonhen chr'éxin inaá.

20 A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehé ch'án tí sín tsíkjejá ch'án ntá k'uetōan ch'án kixin tjoka ts'atsínka tí kjuachrakon a.

21 A ntá jnkójín nkexro tsontáchro kixin: “Tsjehe, ntihi itjen tí Cristo”, o tsontáchro sín kixin: “Tsjehe, ntiha tjen ch'án”, la titekákuènhyará sín.

22 Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjejá Dios.

23 A ntá jahará chrokóxakonhanrá kaín tíha. Tjétjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

24 Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi.

25 A ntá tí konotsé la ts'anótjenxin nkajní la ko tí kjuachaxin siín nkaya nkajní la kjaxin tsínki.

26 Ntá ts'ikon sín tí Xjeen Dios K'óna Chojni itsi chríkjan tjuj tsikao tí kjuachaxin jié.

27 Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

28 'Chrókiénxinrá tí nkehe s̄intayóaxian. Éxí yóhē tí nta t'óna to higo tió sít'ayan kahnte ntá nohará ḱixin ts'ixenhen nchakuen sóa

29 mé xikaha tió ts'ikonrá xikaha tsonhen kaín tíha ntá tsonoaxínrá ḱixin ó kuichjina tí tsjeje chjasintajni.

30 Chaxín ntáxrjan ḱixin kaín tíha tsonhen tí naxa t'enhya tí chojni siín chjasintajni.

31 A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

32 'A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'éni mé nohe.

33 'Méxra chrók'uejotsjehérá, chrók'uejochonhénrá chrónixjehérá Dios ḱixin noahyará nkesá la ko nkehora tsonhen tíha.

34 Éxí yóhē ijnko chojni sátsji kjín, a ntá tí naxa sátxixínhya ch'án ntōe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntōe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia.

35 Méxra jahará chrók'uejotsjehérá ḱixin noahyará nkesá tsokjan tí ìnché tí nchia a, á ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan.

36 Ntá xrinahya tsi ch'án ts'itjaxín ch'án ḱixin tjejochrinrá.

37 Mé xikaha tjonkará la ko xikaha ntátjan kaín chojni ḱixin chrók'uejótsehe sín —ichro ch'án.

14

*Tjový sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)*

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánkí niotja.

Ntá tí sín nchat'á t'etoan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án.

² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

*Ijnko tjan kuikítexín aceite náxrjón xraxé ikja
ch'ín Jesús
(Mt. 26.6-13; Jn. 12.1-8)*

³ A ntá ch'ín Jesús kjuák'e ch'án chjasin Betania ntóe ch'ín Simón, tí ch'ín k'uéchónta chinlepra. A ntá tí tjene ch'ín Jesús ntá xrínahya ikui injko tjan kuikáo tjan injko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuikite tjan kja ch'ín Jesús tí aceite a.

⁴ A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé?

⁵ Íchá jína chrókóxixín iní ciento chichaon denario tí aceite a ntá tí chichaon a mé chrókuitonhen tí chojni nòa —mé xikaha ichro sín k'uántaxínhin sín tjan.

⁶ Ntá ntáchro ch'ín Jesús kixin:

—Nté t̄itohérá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan.

⁷ A ntá tí chojni nòda la ó xráxín ts'ejókoará sín la jína tsjínk̄itsará sín jnkojín yaon. Ntá janhan la jnkochr̄ixínhya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kíxin tsoxravána.

⁹ Chaxín ntáxrjan kíxin tí tsjako sín tí tan jína tsaáxin chojni nkuíxín chjasintajni ntá tsochronka sín kíxin x̄ikaha kjuích'e tí jehe tjan, a ntá x̄ikaha tsoxraxinkakonxín sín tjan kíxin x̄ikaha kjuích'e tjan —ichro ch'án.

*Ch'ín Judas kjuincheckji ch'án tí ch'ín Jesús
(Mt. 26.14-16; Lc. 22.3-6)*

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchat'á t'et̄oan kíxin tsochrónka ch'án nkexrí tsotsé sín tí ch'ín Jesús.

¹¹ A ntá jehe sín la chéhe sín kuínhin sín ntá ntáchro sín kíxin chaxín tsjanjon sín chichaon ts'áyéhe tí ch'ín Judas. Ntá kjuankíxin ch'án kjueyá ch'án nkexrí tsochrónka ch'án kíxin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxixín kia sine sín niotja tsíkjikohya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kíxin:

—¿Nketí t̃jinkávan sátsjini sincheyaxíxinni ḱixin sineni kuènte tí kia pascua? —ichro sín.

13 Ntá k'uetuēnhen ch'án iyó tí sín k'uájiko ch'án ntáchro ch'án ḱixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá.

14 A ntá tí nchia ts'ixenhen ch'án la tsjanchankíhírá tí ìnehé nchia, tsontáchrórá ḱixin: “K'uetōan tí Maestro ḱixin: ¿Nketí t̃jen tí cuarto sinexínko ch'án tí sín xriko ch'án tí kia pascua a?”, x̃ikaha mé tsixrorá.

15 Ntá tsjakohará ch'án ijnko cuarto jíé, yóxin piso mé chón̄ta kaín nkehe t'ichjánx̃in. Mé ntaha mé sincheyaxíxinrá tí nkehe sineni —ichro ch'án.

16 Ntá jehe sín la sákjuí sín chjasin Jerusalén na ntá éxí chrónka ch'ín Jesús mé x̃ikaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

17 A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha.

18 Ntá k'uej́ó sín, a ntá tió t̃jejóne sín ntá ntáchro ch'ín Jesús ḱixin:

—Chaxín ntáxrjan ḱixin ijnko tí jahará t̃jejóne jnkokoá ntihi mé sinchekjiráni —ichro ch'án.

19 Ntá jehe sín mé kjuanḱixin k'uává sín. Ntá kjuanḱixin sín jnkojnko kjuanchankíhi sín tí jehe ch'án ḱixin:

—¿Á janhan ní? —ichro sín.

20 Ntá kjuát̃he ch'ín Jesús ntáchro ch'án ḱixin:

—Jehe ch'án mé ijnko tí teyóxinrá, mé tí nkexro t̃jenekian jnkokoá plato ntihi.

21 Chaxín tí Xjeen Dios K'óna Chojni mé t̃sonhen éxí nixja xroon itén Dios. Kjánchó nòa tí ch'ín

sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ò ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá.

²⁴ Ntá ntáchro ch'án kixin:

—Tíhi mé jñina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni.

²⁵ Chaxín ntáxrjan kixin ts'íhya janhan tí ìnté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ía ìnté to uva nixin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuj sín tí jnà Olivo.

²⁷ Ntá ch'ín Jesús ntáchro ch'án kixin:

—Ijie tie kaín rá tsochakonrá ntá tsjtonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”*

* 14:27 Zacarías 13.7

²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kíxin:
—Kjónté kaín sín tsítóha sín ntá janhan la náhí —ichro ch'án.

³⁰ Ntá ntáchro ch'ín Jesús kíxin:
—Chaxín ntáxrjan kíxin ijie tie tí naxa tsjehya kochíntoa yáya, la jaha mé sinchemána níya kíxin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kíxin:
—Kjónté koína its'én la sintamáhya tí jaha —ichro ch'án.
La ko xikaha ntáchro sín kaín sín.

Ch'ín Jesús nixjexín ch'án Dios tí Huerto Getsemani

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemani. Ntá k'uetuēnhen ch'ín Jesús tí sín k'uájiko ch'án kíxin:

—Tjejorá ntihyó nachrohe janhan tsonixjaha Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankíxin imá k'uává asén ch'án kóxakonhen ch'án.

³⁴ Ntá ntáche ch'án sín kíxin:
—Imá t'avá asenná éxí chrók'uén xikaha. Ijie la ntihyó titohará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankíxin chrónóhe ch'án Dios kíxin chrókjuanjon ch'án kjuachaxin kíxin chrókjuasótehya ch'án tí nkehe chrókónhen ch'án tí yaon a.

³⁶ A ntá ntáchro ch'án kíxin:

—It'eni jaha. Jaha mé chonta kaín xín kjuachaxin na ntá chrónóahani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhí. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'letsjehé ijnko hora?

³⁸ Ijie la tjejotsjehérá la ko chronóehérá Dios kixin títoehya ch'án tí Jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án ínaá chrónóehē ch'án Dios. Ntá ó jehe xikahó xínixja ch'án.

⁴⁰ Ntá íkjan ch'án la ó tjejójua sín ínaá kixin kuihí sín kotáchrin. Ntá í noehya sín nkexrí chrókjuatehe sín.

⁴¹ Ntá níxin sákíki ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án.

⁴² Ntá t'àyará sátsjini kixin ó kjui tí nkexro sinchekjina.

Sákjuíko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuikao ch'án kjuíjiko sín chica espada la ko inta. Na mé kjuachaxién tí sín

nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsíntáchro ch'án kixin:

—Tí ch'ín sinekian kochíto mé jehe tíha la itserá ch'án sátjikoará ch'án —ichro ch'án.

⁴⁵ Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto.

⁴⁶ A ntá tí sin kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra.

⁴⁸ Ntá ch'ín Jesús mé ntáche ch'án tí sín a kixin:

—¿Nkekuèté kixin éxí chrótserá xíchee mé xikaha k'uinkakoará chica espada la ko inta kixin tsotseráni?

⁴⁹ Kaín yaon kjuak'é nkaxenhen nínko kjuákoará, ¿ntá nkekuèté tsehýaráni? Kjánchó t'ichjánxín xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án.

⁵² Kjánchó tí ké ch'án ó tsítsé sín ntá kjónté tjóhín ch'án sákjuí ch'án.

Ch'ín Jesús kóchjina ch'án tí tjejó tí sín t'etoan
(Mt. 26.57-68; Lc. 22.54-55, 63-71; Jn. 18.12-14,
19-24)

⁵³ Ntá sákjuíko sín tí ch'ín Jesús tí ntøe tí nchat'á imá t'etoan. Ntaha mé tsíkójnkotsé kaín tí sín nchat'á t'etoan la ko tí sín táda t'etoan n̄nko la ko tí sín maestro tjako tí ley.

⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nchat'á imá t'etoan a. Ntaha síche xrohi. A ntá ntiha tjejótxaxin tí sín policia tjejóchjixrohe sín, ntá kjaxin ch'án ntahó kuítóhe ch'án tjechjixrohe ch'án.

⁵⁵ Ntá tí sín t'etuēhen tí sín nchat'á la ko kaín tí sín t'etoan kjueyá sín chojni kixin tsochrónka sín nkehe tí jie chóna ch'ín Jesús kixin jina chrók'óyán sín ch'án. Kjánchó ninkexró k'uitjahya sín tsjinkitsa tsochrónka.

⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín.

⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí n̄nko tsíkjich'énaxín chojni tja ntá iní yaon koá la ó tsjak'e ch'án í jnko n̄nko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuēhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tateehya jaha? ¿Á chaxín tí jie t'eka sín tí jaha? —ichro ch'án.

† 14:58 Juan 2.19

⁶¹ Ntá ch'ín Jesús tání ch'án la ninkehó tjateehya ch'án. Ntá xíkjančankí tí nčat'á t'etōan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjaxin ch'án tí tja chjina kjuachaxin kuènte Dios la ko itjuí mé ts'inkajinxin ch'án nkaya nkajní —ichro ch'án.

⁶³ A ntá tí nčat'á t'etōan kótséchje ch'án tí iké ch'án kjuakoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe.

⁶⁴ Jahará ó kuínhínrá kixin k'uántaxínhín ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuíkíte sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuènte nínko chjéhe sín nkayakon ch'án.

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntasin nonte itjen ch'ín Pedro. Ntá ikui ijnko tjan ch'ehe tjan xra tí nčat'á t'etōan.

⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixin chjasin Nazaret —ichro tjan.

68 Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrua —ichro ch'án.

Ntá k'uaxrjexín ch'án ntiha sákjui ch'án ntója. Ntá xrínahya itsje ijnko kochíntoa.

69 Ntá tí tjan a mé k'uíkon tjan tí jehe ch'án ntá chénka tí sín sntaxín ntaha kixin:

—A ntá tí ch'ín i mé jnkojín tí sín a —ichro tjan.

70 Kjánchó kjuínchemá ch'án inaá. Ntá antsí chr'éxín tí sín k'uéjontaxín ntáche sín tí ch'ín Pedro kixin:

—Chaxín kjaxian jaha tsíkjíxian estado Galilea kixin tjatsoanxínni kixin nixja jaha éxí nixja tí jehe sín —ichro sín.

71 Ntá ch'ín Pedro kjuankíxin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

72 Ntá yóxin itsje kochíntoa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntoa yáya mé ó tsjixin sijnchemána níya kixin chonhyana.”‡ Ntá xraxinkaon ch'án tíha la ntá kjuankíxin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín nchat'á t'etōan kójnkotséko sín tí sín táda la ko tí sín tjako tí ley la ko kaín tí sín t'etōan kuènte nínko mé kójnkotsé

‡ 14:72 Marcos 14.30

sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato.

² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

—Kjaxian jaha ntáchrua —ichro ch'án.

³ A ntá tí sín nch'at'á t'etōan mé k'ueka sín ch'án nchónhya jìe.

⁴ Ntá ch'ín Pilato xíkjanckankí ch'án inaá ntáchro ch'án kixin:

—¿Jaha, nkekuènté t'ateehya ninkehó? Tsjehé kixin nchónhya jìe t'eka sín tí jaha —ichro ch'án.

⁵ A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanchia tí sín tsikójnkotsé tí kia a.

⁷ A ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxréé ntá k'óyán sín chojni.

⁸ Ntá kui nchónhya chojni kjuankixin sín kjuanchehe sín tí ch'ín Pilato kixin chrókjuich'e ch'án éxí kaín nánó xikaha.

⁹ Ntá kjuátehe ch'ín Pilato kixin:

—¿Á tjinkáonrá tsjtoha sátsji tí ch'ín Rey t'etuènnen tí sín judío? —ichro ch'án.

10 Mé xikaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'etōan, a ntá tsé sín tí ch'ín Jesús kjuikénhen sín ch'án.

11 A ntá tí sín nchat'á t'etōan a mé kjuínchekóninkaon sín kaín tí chojni siín, ntáche sín kixin íchá jína chrókjuanchia sín kixin chrók'uatjánta ch'án tí ch'ín Barrabás.

12 Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tíkítexínrá kixin ch'ín Rey t'etūnhen tí sín judío la ¿nkehe tjinkáonrá sít'aha ch'án? —ichro ch'án.

13 Ntá jehe sín kjuátehe sín k'óyako sín kjuanchia sín kixin:

—¡Tjakénkania ch'án ntacruz!

14 Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkania ch'án ntacruz! —ichro sín.

15 Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuítóhe ch'án kixin sátsji tí ch'ín Barrabás. Ntá k'uetoan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkani sín ch'án ntacruz.

16 Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado.

17 Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'i.

18 Ntá kjuankíxin k'uíxité sín ntáchro sín kíxin:

—Jnkochríxín tsjak'e tsétuēnhén tí sín judío —ichro sín.

19 Na ntá ntavara chjéhe sín ikja ch'án na ko ntaté sín kuíkíte sín ch'án. K'uéjoxin toch'in sín nkayakon ch'án kjuích'eyáxixín sín éxí imá chrókjuikosáyehe sín ch'án.

20 Ntá tió kjuixin xikaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kíxin ntá tsjak'enkani sín ch'án ntacruz.

*Ntá kjuak'enkani sín ch'in Jesús ntacruz
(Mt. 27.32-44; Lc. 23.26-43; Jn. 19.17-27)*

21 A ntá ijnko ch'in tsíkjixín chjasin Cirene, mé it'in ch'án Simón, mé xjeen ch'án mé tí ch'in Alejandro la ko tí ch'in Rufo, mé tsíkjixín ch'án nontee ch'án, ntá k'uátsínka ch'án ntiha. Ntá tí sín soldado a mé k'uētuenhen sín ch'án kíxin tsochréhe ch'án tsamá ch'án tí ntacruz tsjak'enkáni ch'in Jesús.

22 A ntá sákjuíko sín tí ch'in Jesús ijnko tjo it'in Gólgota, na mé nkívee sín t'axrjexín kíxin Tjo Calavera.

23 Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án.

24 Ntá tí sín soldado kjuak'enkani sín ch'án tí ntacruz a. Kjuixin ntá kjuích'exín sín suerte tí ké

ch'án kixin t̄s̄onohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a.

²⁶ Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáchro kixin: “Jehe ch'án mé Rey kuènte tí sín judío”.

²⁷ Na ko k̄j̄axin k'uéjójányi sín ntacruz yaá tí síchee la ijnko la nánko chjina la í jnko la nó kjon tí t̄jen ch'ín Jesús.

²⁸ Na mé x̄ikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin j̄ie mé k'uíkon sín ch'án”*.

²⁹ Ntá tí sín k'uatsínka ntiha mé kjuanoá sín ch'án la ko k'uántaxính̄in sín ch'án tinkátjía kja sín ntáchro sín kixin:

—Kjá na ntáchr̄ua kixin chrók'oxíka tí n̄inko, a ntá iní yaon koá la ó chrókjuixin chrókjuich'éna ínaá, † ichr̄ua.

³⁰ Nchekaá āsán jahvá t̄jasinkaj̄inx̄ián tí ntacruz méhe —ichro sín.

³¹ Ntá tí sín n̄chat'á t'et̄oan la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé x̄it̄jahya sinchekaá ch'án āsén ch'án.

³² A ntá chaxín jehe ch'án tí Cristo tí Rey kuènte tí nación Israel ntá chrók'uikonni kixin jehó ch'án chrókjuinkaj̄inx̄in ch'án āsén ch'án tí ntacruz ntá k̄j̄axin chrókuitekaonni ch'án —ichro sín.

* 15:28 Isaías 58.12 † 15:29 Marcos 14.58; Juan 2.19

Kjónté tí yaá sín kjaxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjín

³⁴ ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'éni, It'éni, ¿nkekuènté kuitohéni?,‡ mé xíkaha ichro ch'án.

³⁵ Ntá iso sín siín ntiha kuínhin sín, ntá ntáchro sín kixin:

—Tinhínrá kixin t'íyehē ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrxónhya ntá kjuak'ekjen ch'án ijnko nta kjinjin ntá kjuínchekhina ch'án tí tjen ir'va ch'ín Jesús chrók'ui ch'án tí vino náxrxónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajín tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án.

³⁸ A ntá tí ka tjenkakuènxín nkaxenhen nínko mé yaá k'óna k'uichje kjuankíxixín noi la hasta nonte k'uichje.

³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xíkaha ó kjuixin k'uén ch'án ntá ntáchro ch'án kixin:

‡ 15:34 Salmo 22.1

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé.

⁴¹ A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxín tí yaon t'ok'éhe sín,

⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etōan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntōe ch'ín Pilato kjuikjanchia ch'án tí cuerpo kuènte ch'ín Jesús.

⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehē ch'án tí ch'ín capitán a kjuanchankíhi ch'án kixin á chaxín xikaha kónhen.

⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xikaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús.

⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte

ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jíé mé k'uikjèxin ch'án tí ntója tí tòye.

⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús.

² Ntá imá nchítjen tí yaon xrankíxín tí semana mé kjuíji sín tí tòye tsíxravá ch'án, na mé ó kjuíton yaon.

³ A ntá jehe sín mé tinkákjo kichó sín kixin:
—¿Xá nkexro tí chrókuakjìnhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkjixin tsíkjin tí xro jíé tjejkèxin tí tòye kixin í tjenhya éxi k'uéjak'e senó.

⁵ Ntá kjuíji sín ikon tí tòye ntá k'uíkon sín kixin tjetjxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín.

⁶ Ntá ntáchro ch'án kixin:
—Chrakonhyará. Ó nòna kixin xritjéyará jahará tí ch'ín Jesús tsíkjixin chjasin Nazaret kjuák'enkani ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án.

⁷ Ntá sátjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxi tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxránkã sín chrakon sín. Ntá naxã chenkahya sín ninkexró kixin chrakon sín.

*Ch'ín Jesús titàyã xeta tí tjan María Magdalena
(Jn. 20.11-18)*

⁹ Tió tsíkjixin tsíxechón ch'ín Jesús nchítjen tí yaon xrankíxixin semana ntá titàyã xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya.

¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín.

¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàyã k'uíkuèn sín tí
jehe ch'án
(Lc. 24.13-35)*

¹² A ntá chr'éxin ntá iyó tí sín a titàyã k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótji sín ntia sátsji sín ijnko nonte.

¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

*Ch'ín Jesús k'uetuɛnhen ch'án tí sín k'uék'ajiko
ch'án tí xra sich'e sín
(Mt. 28.16-20; Lc. 24.36-49; Jn. 20.19-23)*

* **16:13** Lucas 24.13-35

14 A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án.

15 Ntá ntáche ch'án sín kixin:

—Sátjirá kuenté chjasintajni tjákohérá kaín xín chojni tí tan jína tsaáxin sín.

16 Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte.

17 Ntá tí sín tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkiva.

18 Kjónté konche chrótsé sín la kohya nkehe tsonhen sín la ko kjónté chrók'ui sín ijnko nta chóna veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

*Ch'ín Jesús chrin ch'án nkaya nkajní
(Lc. 24.50-53)*

19 Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios.

20 A ntá jehe sín sákjuí sín nkuíxín sákjuíkjako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoexín tí sín tjejótinhin kixin chaxín nkehe kuènte Dios kjuako sín. Amén.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xcv

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b